

Constitucion de la primièra Amassada euroregionala dels Joves

Apèl a candidaturas del 11 d'octobre al 16 de decembre de 2022

L'Euroregion Pirenèus Mediterranèa, qu'es aquò ?

Territòri de cooperacion, innovant e obèrt, l'Euroregion Pirenèus Mediterranèa (EPM) òbra dempuèi mai de 15 ans per crear de ponts entre nòstres territòris, menar de projèctes comuns al servici dels ciutadans e far ausir lor votz al nivèl europèu. Estructurada en Gropament Europèu de Cooperacion Territoriala (GECT) dempuèi 2009, l'EPM mostrèt sa capacitat a mobilizar los actors de son territòri dins de domenis claus coma l'economia, l'innovacion, la recèrca, l'ensenhament superior, la cultura, lo torisme o encara l'entornament. La Generalitat de Catalonha, lo Govèrn de las Illas Balearas e la Region Occitània, per lor istòria, lors valors comunas e lors ambicions croadas, vòlon contunhar amb l'EPM la construccion d'un pòl de cooperacion de referéncia al caireforç d'Euròpa e al còr de la Mediterranèa.

Per una participacion ciutadana novèla

L'EPM, dins l'encastre de sa fuèlha de rota 2030, vòl melhorar l'inclusion dels ciutadans en facilitar lor participacion e en promòure nòstra diversitat culturala. S'agís en efèit de metre los ciutadans al còr del projècte euroregional per tal de lor permetre d'i participar plenament e aital de promòure las valors comunas qu'animan las regions sòcias. L'EPM desira tanben metre en valor sa diversitat culturala e totes sos sectors culturals, e innovants, en promòure una identitat euroregionala mediterrànica.

Los joves : una prioritat per l'EPM

L'EPM s'estaca ara a implicar mai los ciutadans a l'encòp dins sas accions e tanben dins la definicion d'una part de sa politica de cooperacion e de sos projèctes prioritaris. Per aquò l'EPM vòl donar a la joventut un ròtle clau que representa lo futur del nòstre territòri.

Perqué crear ara una Amassada euroregionala dels Joves ?

2022 es l'Annada europèa de la Joventut, e l'EPM i vòl contribuir plenament en implicar mai les joves dins sas accions, e respondre aital als objectius de sa fuèlha de rota novèla. Per aquò, l'EPM lança en fin d'annada 2022 un apèl a candidaturas al prè de la joventut per participar a la primièra Amassada euroregionala dels Joves.

Per qué far ?

L'Amassada euroregionala dels Joves :

- Se pòt autosasir de subjèctes que li semblan importants de tractar.
- Es un organ consultatiu, a aqueste títol, de l'EPM.
- Pòt far de proposicions als elegits de l'EPM per menar d'accions o propausar de metre en plaça de politics especificas entre las tres regions sòcias.
- Es un luòc d'escambis e de debates entre membres de l'assablada.
- Es tanben un luòc per conéisser e aprener lo foncionament de las institucions de cooperacion territoriala europèa coma las Euroregions.
- Mai largament es un luòc d'aprendissatge de la ciutadanetat europèa e de descobèrta de diferentas culturas entre los tres membres de l'EPM e al delà al nivèl europèu.



EUROREGIO*

Pirineus Mediterrània
Pyrénées Méditerranée
Pirineos Mediterráneo

Qual i pòt participar ?

Tot jove que demòra dins un dels territòris de l'EPM qu'a entre 16 ans faits e 30 ans maximum. Los menors deuràn aver una autorizacion parentala notadament per se poder desplaçar en defòra de lor territòri nacional.

Cossí participar ?

Per participar devètz aver al mens 16 ans e emplenar lo formulari d'inscripcion disponible en linha sul site internet de l'EPM : www.euroregio.eu.

Deuretz tanben jónher una letra de motivacion del format liure. Es a dire quin que siá lo supòrt (escrit, dessenh, video, son, etc.) que i exprimissètz vòstras motivacions, vòstras espèras per participar a la Amassada euroregionala dels Joves e tanben çò qu'i podètz portar.

Cossí son seleccionats los futurs membres de l'Amassada euroregionala dels Joves ?

Es constituïda de 20 a 30 joves que vendràn, idealament, per part egala dels tres territòris.

Es compausada de joves que se presentan siá a títol personal, siá coma representants d'associacions de joves.

Un còp totes los dossièrs de candidaturas recebuts, una comission de seleccion de l'EPM estudiarà las proposicions per tal de s'assegurar de la motivacion reala del jove. D'un autre costat, la comission gaitarà que totes los perfils de joves sián representats al dintre de l'amassada euroregionala dels joves, especialament per çò que n'es de lors cursus de formacion, lors condicions d'estudiants o de joves trabalhaires o sens emplec, e de lor origina geografica. Velharà tanben al respècte de l'egalitat d'oportunitat de genre. Un còp l'equilibri dins la representativitat de totes los perfils possibles assegurats e segon lo nombre de plaças disponiblas (maximum 10 per territòri de l'EPM), se farà un tiratge al sòrt.

Cossí fonciona l'Amassada euroregionala dels Joves ?

Se fa mestier, poirà crear de grups de trabalh segon los subjèctes o prioritats que vòl tractar. Los membres de l'amassada euroregionala dels joves pòdon propausar lo mòde de foncionament intèrne desirat.

Dins totes los cases, totes los membres de l'amassada euroregionala dels joves seràn enquadrats administrativament per la còla tecnica de l'EPM e per çò que fa de l'avançada de lors trabalhs, ne deuràn rendre compte al grop joventut que representa las 3 regions de l'EPM.

Un budgèt serà dedicat al foncionament de l'amassada euroregionala dels joves per assegurar l'organizacion de las reünions e notadament los fraisses de desplaçament dels joves al dintre del territòri segon lo programa d'acamps e de seminaris programats tot de long de l'annada. Serà pilotat per la còla tecnica de l'EPM. Los joves seràn pas remunerats.

Los joves causiràn liurament las lengas de trabalh e de comunicacion en saber que las lengas oficialas de l'Euroregion son l'occitan, lo catalan, lo francés e l'espanhòl. Pas cap de servici d'interpretariat serà assegurat per l'EPM pendent las reünions, a carga pels joves de s'organizar en foncion d'aquò.

Quines son los devers dels membres de l'Amassada euroregionala dels Joves ?

Los membres de l'Amassada euroregionala dels Joves s'engatjan a participar, pendent lor mandat, als acamps als que i son convidats, notadament per d'autres organs de joves equivalents al nivèl europèu.

S'engatjan tanben a produsir pendent lor mandat al mens una recomandacion escrita partejada per totes, o tota altra forma de participacion per alimentar la reflexion dels elegits de l'EPM.

Enfin, s'engatjan per lor participacion a representar e promòure l'imatge de la joventut dels territòris de l'EPM coma d'ambassadors.

Quin es l'interès d'i participar ?

En rejónher l'Amassada euroregionala dels Joves :

- Participatz a una dinamica entre joves de territòris diferents.
- Descubriretz de culturas novèlas, de lengas novèlas.
- Descubriretz lo foncionament de las institucions europèas e l'EPM, un dels espleits de cooperacion interregional impulsat per Euròpa.
- Poiretz descobrir los territòris de l'EPM en participar als fòrums e seminaris organizats dins sos territòris e tanben al moment de rencontres amb d'autres organismes europèus de joves.
- Poiretz dialogar amb d'elegits dels tres territòris membres de l'EPM.
- Propausatz als elegits de l'EPM d'accions o de politicas especificas de metre en plaça entre las tres regions sòcias.
- Profeitaretz de sessions de formacion integradas pendent vòstre mandat per conéisser melhor lo mond de las institucions regionalas, euroregionalas e europèas.
- Recebrez a la fin de vòstre mandat un *open badge* de tipe labèl d'ambaissador de l'EPM que poiretz valorizar.

Durada del mandat dels membres de l'Amassada euroregionala dels Joves

L'amassada es renovelada, en mejana, **cada annada escolara**.

Los membres de l'amassada euroregionala dels joves poirà demandar a renovelar d'un biais automatic lor mandat, dins lo limit d'un renovèlament, siá 2 ans maximum.

En foncion dels resultats del tiratge al sòrt fait per cada territòri, una lista de resèrva de 5 candidats maximum serà establida per òrdre de prioritat. Aqueles candidats poirà prene la plaça d'autres membres de l'amassada qu'abandonarián lor plaça pendent la primièra mitat del mandat. Aqueles pòstes daissats liures devon èsser provesits abans l'acamp seguent de l'amassada, a partir del moment que la demission es presentada. En cas de demission après la primièra mitat del mandat, los pòstes liures seràn pas mai provesits.

Lo 1^{er} mandat dels membres de l'amassada durarà fins a l'estiu de 2024, doncas excepcionalament per un periòde de 18 meses.

La mesa en plaça de l'Amassada euroregionala dels Joves serà efectiva al moment de l'Amassada generala de l'EPM prevista al mes de febrèr de 2023.

Calendari de l'apèl a candidaturas pels futurs membres de l'Amassada euroregionala dels Joves

L'apèl a candidaturas serà obèrt del **11 d'octobre fins al 16 de decembre de 2022 inclús (abans mièjanuèit)**.

La causida definitiva dels membres de l'amassada euroregionala dels joves se farà abans la fin de 2022.